



КОНКУРС «Астана и Президент»

Базылбекова Баян,

№ 4 орта мектебінің 10 сынып оқушысы

Көп аузынан түспейтін,
Отан деген немене?

Оның тұлға, түс, кейпін,

Достым, білгің келе ме?

Б. Ысқақов

Менің Отаным – Қазақстан Республикасы. Әр адамға өз Отаны ыстық көрінеді. Отан – оттан да ыстық. Кең – байтақ Отанымның жүрегі – Астана қаласы.

Астана – Еуразия жүрегі, өзінің мәні бойынша теңдесі жоқ орны, бай тарихы бар. Адамдар Есіл мен Нұранның төңірегіндегі жағалауларды тас ғасырында игеруді бастаған. Бұл жерде қазақтардың соңғы ханы – Кенесары Қасымовтың басшылығымен XIX ғасырдағы әлемдік тарихтағы отаршылыққа қарсы көтерілістердің негізгі оқиғалары өрістеген. Археологиялық көмбелер, көптеген ескерткіштер, мұражайлар жаңа астананың өткен кезеңдері туралы естелікті сақтайды. Олар арқылы біздер ежелгі тарихпен, мәдениетпен, көшпенді қазақтардың тұрмысымен, сол жерде тұратын халықтардың әдет-ғұрыптарымен, дәстүрлерімен таныса аламыз.

Тұңғыш Президентіміз сайланып, өкімет жасақталғаннан кейін, дербес ел болудың алғы шарттары іске аса бастады. Солардың бірі Республика орталығын жаңаша белгілеу, жаңаша құру. Қазақстанның астанасын Алматыдан Ақмолаға ауыстыру жас мемлекетіміздің әлі белі бекіп, бұғанасы қатаймаған кезі мен жетіспеушілік, қиындықтары мол өтпелі кезеңінде Елбасымыз Н.Ә.Назарбаев тарапынан алға қойылған еді.

Астананы ауыстыру тосын да сирек оқиға. Қоныс аудару да адам өміріндегі айрықша оқиға болып саналады. Адам өмірбаяны сияқты мемлекет тарихында да қоғамның, мемлекеттің саяси орнын,

орналасқан жерін өзгерту туралы талай кезеңдер болды. Жалпы астананы көшіру процесі- біртұтас эпопея деуге болады. Астананы ауыстыру көптеген экономикалық, саяси, демографиялық, географиялық жағдайларға байланысты туындады. Ел астанасы Ақмолаға ауысқаннан кейін қаланың атын өзгерту мәселесі алға қойылып, шешімін де тапты. Ақмола 1998 жылғы 6 мамырда Президент жарлығымен «Астана» болып өзгергені белгілі. Ал мекен ауыстырудың қолайлылығы біріншіден, Астана қаласы республиканың орталығында орналасқан, екіншіден, жаңа құрылыстар бұл өлкенің экономикасын көтеруге, әлеуметтік жағдайын жақсартуға мүмкіндік береді. Сөйтіп 1998 жылы 10 маусымда Қазақстанның жаңа астанасы- Астана қаласының салтанатты тұсаукесері болды.

Астана қаласының өмірге келуі Н.Ә. Назарбаевтың есімімен тығыз байланысты дей аламыз. Президенттің бастамасы бойынша республикада ғасырлар тоғысында жаңа астананың құрылысы басталды. Қазір ол өзінің 12 жылдық өмірінде егеменді Қазақстанның әкімшілік орталығы ғана емес, ол- әрі елдің мақтанышы, әрі жүзі, әрі біздің мемлекетіміздің саяси-әлеуметтік, экономикалық табыстарының символы.

«Туған жердей жер болмас, туған елдей ел болмас» – дейді халық мақалы. Бүгінгі күні жас Астана адам танымастай өзгерген. Аз уақыт ішінде ол біздің миллиондаған азаматтарымыз үшін Отанымыздың нағыз жүрегіне айналып отыр. Кез келген жүрек сияқты жаңа астана да Қазақстанның барлық өміріне нәр берумен қатар, ұлттық рух пен сананы көтеруде. Жас Астана Шығыстың талғампаздығы мен Батыстың талғампаздығын тамаша үйлестірген ауқымды құрылыс жұмыстары мен әсем сәулет өнерінің туындыларымен таңғалдырады. Сәулет өнерінің үздік үлгідегі ескерткіштері, әсем ғимараттары және алуан гүлдермен өрнектелген бау-бақшалары қаланың ең озық рухани құндылықтарды бойына жинаған мәдениетті қалаға айналғанын көрсетеді, Еуразиялық мемлекет екендігін айқындай түседі.

Елордада Президенттік Мәдени орталық, Конгресс-Хол, Мәдениет сарайы, халықаралық деңгейдегі мейрамханалар салынып, Есіл өзенінің жағалауы көркейтіліп, жаңа алаңдар, саябақтар бой көтеріп, кітапхана, спорттық кешендер, театрлар, оқу орындары, мұражайлар, «Президент мұражайы», 2001 жылы 8 қыркүйекте Қазақстан Президентінің бастамасымен «Атамекен картасы» тарихи-этнографиялық кешені ашылды.

Сөйтіп, Астана біздің көз алдымызда Қазақстанның ең көркем қаласына айналып келеді. Көз алдымызда өсіп-өркендеп жатқан қаламыздың күн санап құлпыра түсуі, оның жасыл желегі жайқалып, аспанмен таласқан биік үйлері,

[Введите текст]

көңілімізге шаттық ұялататын күндерін көру біздің арманымыз болатын. Арманымыз кезегімен жүрегімізден орын тауып келеді деп ойлаймын. Бейбіт өмірде баянды бақытымыз ортаймай, Елбасы ұстанған бағытын болашақ ұрпақтар қалтқысыз жалғастыра берсек, еліміздің жүрегі – Астана қаласы дамуын, өркендеуін арттыра береді. Тек, адал еңбек, елге деген сүйіспеншілік, құрмет керек. Сонда болашақта бұдан да көркейіп, әлемге әйгілі, көркін суреттеуге сөз жетпейтін сәулет орталығына айналады және экономикасы жоғары қала болады деп толық сенемін.

Астананың болашағы-біздің болашағымыз. Сондықтан ақын Т. Молдағалиевтің

Болашақ сенде тамаша,

Боларсың адам Қадірлі.

Сол Отан үшін қаласа,

Аяма жалғыз жаныңды. —

деген өлең сөзін көңілге түйіп жүрген дұрыс деймін.